

Ni Presidente Dieter F. Uchtdorf

Maikadua a Mammagbaga iti
Umuna a Panguluén



Nasayaat ti amin

No panunotek maipapan iti tawidtayo kadagiti nagkauna a kameng, maysa kadagiti makatignay a banag nga umay iti panunotko ket ti himno a “Come, Come, Ye Saints” (*Hymns*, no. 30). Dagiti naka-aramid iti atiddog a panagdaliasat iti Salt Lake Valley ket masansan a kantaenda daytoy a himno bayat daytoy a panagbaniagada.

Ammok unay a saan a nasayaat ti amin kadagitoy a Santo. Naipasangoda iti sakit, pudot, bannog, lamiis, bu-teng, bisin, saem, duadua, ken uray pay ipapatay.

Ngem iti baet ti kaadda iti tunggal gapu tapno mangi-pukkaw iti, “Saan a nasayaat ti amin,” napadur-asda ketdi ti galad a daydayawentayo ita. Imbilangda dagiti parikutda iti agnanayon a bendision. Nagyamanda kadagiti kasasa-adda. Iti baet ti pakakitaan iti isusupiat, kinantada iti amin a kinatibker ti pammati ti kararuada, “Nasayaat ti amin!”

Ti panagdayawtayo kadagiti nagkauna a kameng ket awan kaes-eskanna no saan a mangigapu iti akin-uneg a panagpanunottayo. Dakamatek ti sumagmamano kadagiti kababalinda a mangparparegta kaniak bayat ti panangpanunotko iti sakripisio ken panagkumitda.

Panangngaasi

Nagpipinnateg dagiti nagkauna a kameng iti tunggal maysa kadakuada ania man dagiti nagtaudanda a mainaig iti gimong, ekonomia, wenno politika. Uray pay daytoy

ti nangpabayag iti panagrang-ayda, mangigapu iti saan a pannakagin-awa, wenno bukod a panagsakripisio wenno panagbannog, nagtitinnulongda iti tunggal maysa.

Iti lubongtayo nga adda dagiti panggep a tun-oyen ken kapartido, ad-adda nga ipangpangruna dagiti panggep ti sangapartido wenno bukod ngem iti panagpipinnateg wenno panangpapigsa iti pagarian ti Dios. Iti gimongtayo ita, dagiti panangragpattayo kadagiti panggep a tun-oyen iti politika ket mabalin nga agparang a pangrukod iti kinapategtayo.

Ti panangituding ken panggun-od kadagiti panggep a tun-oyen ket mabalin a napintas a panggep. Ngem no umay ti balligi iti panangragpat kadagiti panggep a tun-oyen a pakaigapuan ti saan a panangibilang, saan a panangikankano, wenno panangpasakit kadagiti sabali, mabalin a nakapatpateg ti gatad dayta a balligi.

Inaywanan dagiti nagkauna a kameng dagiti kaka-duada, ken kinitada pay dagiti simmaruno kadakuada, ket nagmulada para kadagiti lukan a simmurot.

Ammoda ti pigsa ti pamilia ken dagiti gagayyem. Ket gapu ta nagpannurayda iti tunggal maysa, nagbalinda a napigsa. Nagbalin a pamilia dagiti gagayyem.

Nagserbi dagiti nagkauna a kameng a kas nasayaat a palagip ti no apay a nasken a parmekentayo ti sulisog a mangibukod iti bagitayo, ngem ketdi, danunen tapno tulu-ngan ti tunggal maysa ken maaddaan iti asi ken agiinnayat iti maysa ken maysa.

Aramid

“Maykay’ Sasanto; awan pagbutnganyo.”

Nagbalin daytoy a binatog a kansion kadagiti nabannog nga agdaldaliasat. Narigat a panunoten no kasano ti karigat ti panagbannog dagitoy naindaklan a kararua. Pannagna ti maysa kadagiti kalakaan nga inaramidda. Nasken nga agtitinnulongda nga agbannog tapno makaipaayda iti taraon, makatarimaan kadagiti karison, makaaywanda kadagiti ayup, makapagserbida kadagiti masakit ken nakapuy, makasapul ken makapagsakdoda, masaluadanda dagiti bagbagida kadagiti dumteng a peggad ti tiempo ti panawen ken adu pay a makapeggad a banag iti let-ang.

Agriingda iti tunggal agsapa nga addaanda kadagiti nalawag a panggep ken tun-oyen a maawatan ti amin: tapno agserbi iti Dios ken kadagiti padada a tao ken makasangpet iti Salt Lake Valley. Inaldaw a nalawag kadakuada dagita a panggep ken tun-oyen; ammoda no ania ti masapul nga aramidenda ken napateg ti panagdur-as ti tunggal aldaw.

Iti panawentayo—a nalaka unay a ragpatentayo ti kaa-duan ti tartarigagayantayo—makasulisog ti agsikko wenno sumuko no kasla narusanger wenno nasang-at wenno nateppang ti kalsada a pagnaan iti sanguanantayo. Kadagita a kanito, mabalin a maparegtatayo a mangpanunot maipapan kadagiti lallaki, babbai, ken annak a saan a nangpalubos iti sakit, rigat, saem, ken uray pay patay tapno manglapped kadakuada iti pinilida a dalan.

Naadal dagiti nagkauna a kameng a ti panagaramid kadagiti narigat a banag ket nangpauneg ken nagpapiaksa iti bagi, panunot, ken espirituda; nangpalawa iti pannakaawatda maipapan iti nadiosan a kababalin; ken nangpaddockel iti kinaasida kadagiti dadduma. Daytoy nga ugali ti nangpatibker kadagiti kararuada ken nagbalin a parabur kadakuada iti napaut kalpasan ti gibus ti panagbaniagada kadagiti kapatagan ken kabambantayan.

Panangnamnama iti Nasayaat

Idi nagkanta dagiti nagkauna a kameng, nangipeksada iti maikatlo nga adalen: “Yisemyo ti rigat.”

Daytoy ti maysa kadagiti naindaklan nga ironia [kayatna a sawen a sao a kasupadina ngem pudno] ti panawentayo a nakaparaburantayo iti nawadwad ngem mabalin a nalidaytoy. Dagiti datdatlag ti kinarag-ay ken teknolohia ti mangparag-oadatayo ken mangtedda kadatayo iti seguridad, ragraagsak, apagkanito a pannakapnek, ken nam-ay, ngem iti baet ti amin dagitoy mariknatayo ti nalaus unay a panagliday.

Dagiti nagkauna a kameng, a nalaus ti panagsakripisioda, nagnada nga awanan a pulos ken nabisinanda uray koma la dagiti kangrunaan a kasapulan tapno agbiagda. Naawatanda a saan a dumteng ti ragsak kas bunga ti gasat wenno pasamak a di namnamaen. Awan duadua a saan a dumteng daytoy manipud iti kaadda ti amin a tarigagay a pimmudno. Saan a sumangbay ti ragsak manipud kadagiti pasamak iti ruar. Sumangbay daytoy manipud iti uneg—ania man ti mapaspasamak iti aglawlawtayo.

Ammo dagiti nagkauna a kameng dayta, ken addaan iti dayta nga espiritu nasarakanda ti ragsak iti tunggal pasamak ken tunggal pannubok—uray kadagita a pannubok a nangaring kadagiti kaunggan a paset dagiti kararuada.

Dagiti Pannubok

No dadduma malaglagiptayo maipapan iti panagibtur dagiti nagkauna a kameng ken sigigin-awa nga isaotayo, “Agyamanak ta diak pay nagbiag iti dayta a panawen.” Ngem ania ngata no dagita a natured a nagkauna a kameng no makitadatayo koma ita, ket saanda kadi a mayebkas ti isu met la a pakaseknan.

Nupay nagbalaliwen dagiti panawen ken pasamak, saan a nagbalbaliw dagiti pagbatayan para iti panangsango kadagiti pannubok ken naballigian a panagbiag a sangkamaysa kas managpipinnateg ken rumangrang-ay a komunidad iti Dios.

Manipud kadagiti nagkauna a kameng masursurotayo ti maaddaan iti pammati ken panagtalek iti Dios. Masursurotayo ti maaddaan iti panangngaasi kadagiti dadduma. Masursurotayo a ti aramid ken kinagaget ti mangparabur kadatayo saan laeng a temporal no di ketdi pay spiritual. Masursurotayo a sidadaan a gun-odentayo ti ragsak ania man dagiti kasasaadtayo.

Ti kapintasan a wagas a makapagdayaw wenno maipakitatayo ti panagyaman kadagiti nagkauna a kameng ket ti panangusartayo iti bukodtayo a biag dagiti kinapudno kadagiti bilin ti Dios, panangngaasi ken panagayattayo kadagiti padatayo a tao, ken ti kinagaget, panangnamnama iti nasayaat, ken ragsak dagiti nagkauna a kameng nga impakitada a naimbag iti bukodda a panagbiag.

No aramidentayo daytoy, madanontayo iti panaglabas dagiti dekada ti panawen, a mangkibin kadagita a natakngeng a nagkauna a kameng, ket inayontayo dagiti bukodtayo a timek iti timekda bayat ti panakipagkantatayo kadakuada iti: “Nas’yaat! Nas’yaat!”

PANANGISURO MANIPUD ITI DAYTOY A MENSAHE

Mabalin a kayatyo a rugian babaen ti panangkanta iti "Come, Come, Ye Saints" (*Hymns*, no. 30) a kaduayo dagiti sarungkaranyo. Mabalinyo ti mangisalaysay iti maysa a padas no dakayo wenno ti maysa a tao nga am-ammoyo ket nangyaplikar iti biagna kadagiti pagbatayan ti panangngaasi, aramid, wenno panangnamnama iti nasayaat. No maparegtakayo, mabalinyo ti mangipaneknek maipapan kadagiti parabur a dumteng manipud iti panagbiagyo kadagitoy a pagbatayan ket ikariyo kadagiti sarsarungkaranyo a makaawatda met kadagiti kasta met la a parabur.

AGTUTUBO

Panangidulin iti Kasuratan

Idilig ni Presidente Uchtdorf ti panawentayo kadagiti panawen dagiti nagkauna a kameng. Idinto a dikayo nakapaglasat kadagiti kapatagan, ad-adda a maipadakayo kadagiti nagkauna a kameng ngem iti mabalin a panagkunayo! Mabalinyo met ti mangipakita iti kaasi, napasnek nga aramid, ken panangnamnama iti nasayaat. kas iti pannakammotayo nga naipakita dagiti nagkauna a kameng dagitoy a kababalin gapu kadagiti kasuratan nga indulinda, maam-ammodakayo met dagiti kaputotanyo babaen kadagiti journal wenno listaan ti padpadasyo.

Mangala iti sumagmamano a minuto a mangisurati iti sangkabassit maipapan iti bagiyo iti journalyo. mabalinyo nga isurat maipapan kadagiti naespirituan a bambanag, kas koma iti no kasano aa nagun-odyo ti pammaneknekyo wenno kasano a narimbawanyo dagiti pannubok babaen ti tulong ti Nailangitan nga Ama. Mabalinyo pay a tulongan dagiti appokoyo iti tumeng

(a mabalin a mangbasanto ti journalyo iti maysa nga aldaw) tapno maammuanda no ania idi ti inaldaw a panagbiagyo. Ania dagiti proyekto nga ar-aramidenyo iti pagadalan? Ania ti langa ti siledyo? Ania ti paggugustoyo a lagip maipapan itii familiayo?

Bayat ti panangirugiyo nga agsurat iti sangkabassit iti inaldaw, saan laeng a kabaelanyonto ti kumita a nasaysayaat no kasano a tultulongannakayo ti Nailangitan nga Ama iti inaldaw a panagbiagyo, kas met laeng iti panangtarabayna kadagiti nagkauna a kameng, ngem ketdi makaibatikayto pay iti maysa a tawid para iti masakbayan a kaputotanyo.

ANNAK

Panagsurot iti Pagwadan dagiti Nagkauna a Kameng

Imbinglay ni Presidente Uchtdorf ti sumagmamano a wagas a nangipakitaan dagiti nagkauna a kameng iti ayatda para iti Nailangitan nga Ama. Kabaelanyo suruten dagiti wagas ti pagwadanda. Dagitoy ti sumagmamano a kapanunotan a pangrugianyoy:

PANANGNGAASI

- Agsurat iti makaliwliwa a surat wenno ipasiarmo ti maysa a tao a malidlidayan.
- Tulongam ti maysa a kklase iti homeworkna.

ARAMID

- Mangitundingka iti maysa a panggep a tun-oyen. Agaramidka iti maysa a banag iti daytoy a bulan a makatulong kenka a mangragpat iti paggepmo a tun-oyen.
- Tulongam dagiti dadakkelmo nga agluto iti pangrabii.

PANANGNAMNAMA ITI NASAYAAT

- Agaramidka iti listaan ti 10 a banag iti biagmo.
- Umisemka iti maysa a tao a makitam.



Pammati • Pamilia • Tulong

Dagiti Kababalin ni Jesucristo: Manangpakawan ken Naasi

Nainkararagan nga adalenyo daytoy a material ken kalikagumanyo nga ammuen no ania ti ibinglayyo. Kasano ti pannakaawatyo iti biag ken mision ti Mangisalak ket mangpapigsa iti pammatiyo Kenkuana ken mangparabur kadagiti ay-aywananyo babaen ti visiting teaching? Para iti ad-adu pay nga impormasion, mapan iti reliefsociety.lds.org.

Daytoy ti paset ti maysa a serye dagiti Mensahe iti Visiting Teaching a mangitampok kadagiti kababalin ti Mangisalakan.

Ti pannakaawat a manangpakawan ken naasi ni Jesucristo kadatayo ket makatulung kadatayo a mangpakawan ken mangipaay iti kaasi kadagiti sabali. “Ni Jesucristo ti Pagwadantayo,” kinuna ni Presidente Thomas S. Monson. “Ti biagna ket tawid ti ayat. Inagasanna dagiti masakit; tinulongan ken pinaregtana dagiti marigrigat ken maidaddadanes; insalakanna ti managbasol. Iti kamaudiananna ket pinatay isuna ti makagura a bunggoy a mangriribuk. Nupay kasta umar-araraw manipud iti turod ti Golgota dagiti balikas: ‘Ama, pakawanem ida; ta dida ammo ti ar-aramidenda’—maysa a kangrunaan a pagwadan ti asi ken ayat iti biag iti daga.”¹

No pakawanentayo dagiti sabali kadagiti basolda, pakawanennatayonto met ti Nailangitan nga Ama. Indawat kadatayo ni Jesus nga “agbalinkayo ngarud a naasi, kas iti panagbalin met ti Amayo aa naasi” (Lucas 6:36). “Umay ti pannakapakawan dagiti *basoltayo* nga addaan kadagiti kondision,” kinuna ni Presidente Dieter F. Uchtdorf, maikadua a Mammagbaga iti Umuna a Pangulu. “Nasken nga agbaba-witayo. Ditayo kadi amin, iti maysa

a panawen wenko sabali, sipapakumbaba nga umasideg iti tugaw ti kaasi ket dumawattayo iti parabur? Ditay kadi tinarigagayan ti asi iti amin a pigsa ti kararuatayo—tapno mapakawan kadagiti biddut nga inaramidantayo ken dagiti basol nga inaramidantayo? Ipalubosyo ti Pannubot ni Cristo a mangbalbaliw ken mangpaimbag iti pusoyo. Aggiinna-yatkayo. Agpipinnakawankayo.”²

Dagiti Mainayon a Nasantuan a Kasuratan

Mateo 6:14–15; Lucas 6:36–37; Alma 34:14–16

Manipud kadagiti Nasantuan a Kasuratan

“Nasken a mamakawantayo a kas iti pannakapakawantayo,” kinuna ni Elder Jeffrey R. Holland ti Korum dagiti Sangapulo-ket-dua nga Apostol.³ Ti estoria maipapan iti nayaw-awan nga anak a lalaki ket mangipakita kadatayo iti agpada a dua a kita ti panagpakawan: napakawan ti maysa nga anak a lalaki ken ti maysa nga anak a lalaki ket nagkarigatan a mamakawan.

Innala ti inaudi nga anakna a lalaki ti tawidna, alisto a binusbosna daytoy, ken idi panagbisin, nagtrabaho isuna a para pakan iti baboy. Kuna ti nasantuan a kasuratan, “idi

a nagpanunot,” nagawid isuna ket kinunana iti amana a saan isuna a maikari nga agbalin nga anakna. Ngem pinakawan isuna ti amana ket impartianna iti nalukmeg a baka tapno agpapasken. Nagawid ti inauna nga anak manipud iti trabahona iti talon ket nakagura. Impalagipna iti amana a nagserbi isuna iti adu a tawen, saan a naglabsing kadagiti bilin ngem “uray kaano dinak inikkan iti bassit a kalding tapno makipagragragsak kadagiti gagayyemko.” Insungbat ti ama, Anak sika addaka nga agnanayon kaniak, ket amin dagiti gamengko kukuam ida. Ngem masapul ti panagrampak ken panagay-ayat: ta daytoy kabsatmo natay ket nagungar, ken napukaw ket nasarakan” (kitaen iti Lucas 15:11–32).

DAGITI NAGADAWAN

1. Thomas S. Monson, “Love, the Essence of the Gospel,” *Liahona*, Mayo 2014, 91.
2. Dieter F. Uchtdorf, “The Merciful Obtain Mercy,” *Liahona*, Mayo 2012, 70, 75, 77; emphasis in original.
3. Jeffrey R. Holland, “The Peaceable Things of the Kingdom,” *Ensign*, Nob. 1996, 83.

Ibilang Daytoy

Kasano a ti pammakawan ket pagsayaatan ti maysa a mamakawan?